



SUATEA



COMUNICÁU PRENSA: EDUCACIÓN

FUERA DE LA LLEI

Asina se pue titular la película d'aniciu de cursu 2010-2011 en xeneral y particularmente no que cinca al enseñu de la Llingua Asturiana y Gallego-Asturiano. Alcordémonos que l'artículu 10 de la Llei d'Usu diz *"el Principáu d'Asturies ha garantizar la enseñanza del bable/asturianu en tolos niveles y graos, respetando sicasí la voluntariedad del so aprendimientu. De cualesquier manera, el bable/asturianu ha ser enseñáu dientro del horariu escolar y va ser consideráu como materia integrante del currículu"*. Entamó'l cursu y **la mayoría de los centros nun ufiertaron al alumnáu d'EI**, como ye prescriptivo, la enseñanza de Llingua. Ye más, munchos centros solicitaron ufiertar estes enseñances y dende'l Serviciu Inspección, cola supervisión del conseyeru, denegóse esta pitiición. Más entá: nel ámbitu de los recortes nes plantiyes xustificaos pola "crisis", les places ufiertaes de Llingua en Primaria mermaron en 16 y cerca del 50% son a media xornada. Estos recortes en personal tradúcense na merma de la calidá de la enseñanza coles ratios al máximu en Primaria y la **eliminación** de l'atención al alumnáu d'Infantil en delles de les poquísimes escueles onde los y les escolines d'esta etapa reciben enseñanza de Llingua (solo'l 12% del alumnáu d'Educación Infantil recibía'l cursu pasáu clases de Llingua o Gallego-Asturiano).

La situación de la Educación Secundaria y Bachilleratu ye llaceriosa. Los datos falen per ellos solos: solo 18 places xornada completa (16 menos que l'añu pasáu) y 46 a media xornada (71% del total). La merma de places en comparanza col añu pasáu ye de 8. El númberu d'alumnos d'estes etapes atendíos nesta aria solo yera del 18%. Esto ye consecuencia de la competencia del aria con otres al ser non solo voluntaria sinón tamién **optativa**, contravinendo asina tamién l'artículu 10 LI.Usu (*"Pa los que lo escueyan, el so aprendimientu o usu nun podrá torgar que reciban la mesma formación y conocimientos n'igualdá de condiciones que'l restu del alumnáu"*); y la **imposición de ratios mínimes** de formación de grupos pa recibir enseñances del aria que choquen cola condición de **voluntariedad y derechu fundamental** regulaos pola nomada Llei.

Dende SUATEA desiximos a l'Alministración:

- Que cumpla la Llei d'Usu y respete los derechos llingüísticos del alumnáu.
- Qu'acabe colos retayos nes plantiyes de Llingua Asturiana y Gallego-Asturiano.
- Qu'igüe'l currículu d'Educación Infantil pa que recueya esplicitamente'l nuestro patrimoniu llingüísticu y que demientres nun lo faga s'atiendan toles demandes d'escolarización nesta etapa fundamental pal deprendimientu en xeneral y el llingüísticu en particular.
- Qu'igüe'l currículu de Secundaria y Bachilleratu (contrariu a la Llei d'Usu) y que demientres nun lo faga s'atiendan toles demandes d'escolarización.
- Que salga del territoriu **FUERA DE LA LLEI**

SINDICATU UNITARIU Y AUTÓNOMU DE TRABAYADORES DE LA ENSEÑANZA D'ASTURIES